

ԿԱՐԾԻՔ

(պաշտոնական ընդդիմախոսի)

ԻԳ.00.01 - <<Քաղաքական գիտության տեսություն>> մասնագիտությամբ, քաղաքական գիտությունների թեկնածուի գիտական աստիճանի հայցման համար, **Խոսրովադուխտ Գարեգինի Ազատյանի «Պառլամենտարիզմի առանձնահատկություններն ու միտումները փոխակերպվող հասարակություններում»** թեմայով ատենախոսության վերաբերյալ

Խոսրովադուխտ Ազատյանի ատենախոսության թեման **արդիական է**, քանի որ ներկայումս պառլամենտարիզմը ժողովրդավարական պետությունների համար կարևոր երևույթ է: Յուրաքանչյուր երկրում այն գտնում է արտահայտման իր սեփական ձևը և բնորոշվում է տվյալ պետությանը հատուկ առանձնահատկություններով: Չնայած պատմական տարբեր ժամանակահատվածներում հանդիպած դժվարություններին և սրընթաց փոփոխվող միջազգային կյանքին՝ պառլամենտարիզմը հարթել է իր տեղը և շարունակում է մնալ քաղաքական կյանքի և ժողովրդավարության զարգացման հիմքերից մեկը: Բացի դրանից՝ Հայաստանում, սահմանադրական բարեփոխումներին հաջորդած քաղաքական գործընթացները խիստ անհրաժեշտ են դարձնում պառլամենտարիզմի իրավաքաղաքական վերլուծությունը փոխակերպվող հասարակություններում, մասնավորապես Հայաստանի Հանրապետությունում: Նման վերլուծությունը կարևոր ու արդիական է նաև պետության քաղաքական զարգացման ուղենիշները վերհանելու և հեռանկարները ուրվագծելու տեսանկյունից: Խորհրդարանական կառավարման համակարգին անցման գործընթացը ներկայումս թևակոխել է զարգացման նոր փուլ՝ համընկելով ներքաղաքական տեղաշարժերի հետ, ինչն անհրաժեշտ է դարձնում պառլամենտարիզմի թեմայի շուրջ գիտական ուսումնասիրությունների իրականացումը: Այս առումով, արդիական են հիմնախնդրի ուսումնասիրության ինչպես գիտական, այնպես էլ մեթոդաբանական ասպեկտները: Ատենախոսության **նպատակները** գիտական են: Ատենախոսը հասարակական-քաղաքական մտքի և հայեցակարգերի շրջանակներում գիտական պատշաճ մակարդակով ուսումնասիրել է պառլամենտարիզմի տեսահայեցակարգային հիմքերը: Ժամանակակից պառլամենտարիզմը հասարակական-քաղաքական երկարատև զարգացման արդյունք է: Այս բազմաշերտ ֆենոմենի ակունքներում ընկած տեսահայեցակարգային հիմքերի վերհանումը հեղինակն իրականացրել է դրա կայացման հաջորդականությունն ու ժամանակագրությունը ներկայացնելու ճանապարհով: Համեմատական մեթոդի կիրառմամբ Խ. Ազատյանը դիտարկել է

Արևելյան Եվրոպայի և հետխորհրդային տարբեր երկրներում փոխակերպման գործընթացների բնույթը քաղաքական անցման համատեքստում:

Ես գնահատում եմ հեղինակի կողմից ՀՀ-ում պառլամենտարիզմի զարգացմանը խոչընդոտող պատճառների վերհանումը, որն էլ հնարավորություն է տվել բացահայտել դրա զարգացման հրամայականները:

Հեղինակն իր աշխատությունն առավել համապատասխանեցրել է մասնագիտական շիֆրին և հետազոտությունն արվել է քաղաքական գիտության տեսության կտրվածքով: Ներկայացվել է ժողովրդավարության զարգացման վրա պառլամենտարիզմի ունեցած նշանակությունը: Դրական է այն, որ տեսական հետազոտության արդյունքները առարկայացած են քաղաքական գործընթացների վերլուծությամբ:

Գաղտնիք չէ, որ ցանկացած ատենախոսության արժևորման առաջնային չափանիշը գիտական նորույթի առկայությունն է: Հետազոտության գիտական նորույթը հստակորեն ձևակերպված է առանձին դրույթներով: Ատենախոսության մեջ գիտական նորույթ պարունակող առավել հիշարժան արդյունքներ ենք համարում ՀՀ-ում պառլամենտարիզմի զարգացմանը նպաստող որոշակի մեխանիզմների առաջարկումը, որոնցից են ընտրական օրենսգրքի կատարելագործման, պատգամավոր-ընտրող երկկողմ հաղորդակցության ամրապնդման, հանրային ընկալումներում խորհրդարանի ինստիտուտի իմիջի բարձրացման անհրաժեշտությունների մատնանշումը և այլն: Ատենախոսին հաջողվել է կոնկրետացնել իր ուսումնասիրության նպատակային լուծումները: Այսպես օրինակ, հիմնավորվել է, որ պառլամենտարիզմի կայացման համար կառավարման համակարգի ընտրությունը կարևոր, սակայն ոչ բավարար պայման է: ՀՀ-ում պառլամենտարիզմի զարգացումը դիտարկվել է փոխակերպման գործընթացների պրիզմայի ներքո: Հիմնավորվել է, որ հենց փոխակերպման առանձնահատկություններով էլ պայմանավորվել է պառլամենտարիզմի զարգացումը Հայաստանի Երրորդ Հանրապետությունում:

Արժևորում եմ Խոսրովադուլիստ Ազատյանի ատենախոսությունը որպես քաղաքական գիտության տեսության մասնագիտությամբ հետազոտություն, որովհետև հեղինակը ուսումնասիրել է այս ոլորտի կարևոր տեսական հիմնախնդիրներ: Գիտական մակարդակով ներկայացվել է պառլամենտարիզմի հիմնախնդիրը արդի քաղաքագիտության դիսկուրսում, որը հնարավորություն է տվել հասկանալու, թե որքանով է հեղինակն իր լուծման ներդրել այս ոլորտում:

Արդի քաղաքական գիտությունների համար օրակարգային հարց է ժողովրդավարության կայացման նախադրյալների բացահայտումը: Այս առումով հեղինակը ևս որոշակի ներդրում ունի, որովհետև կարողացել է հիմնավորել, որ առանց իրական գործառնող խորհրդարանի անհնար է կառուցել ժողովրդավարական իրավական պետություն, ստեղծել օրենսդրության և իրավունքի արդյունավետ համակարգ, հասնել քաղաքական կուսակցությունների զարգացմանը:

Կարևոր է, որ հեղինակը նախանշել է ՀՀ-ում պառլամենտարիզմի զարգացման միտումները: Հիմնավորվել է, որ ՀՀ-ում պառլամենտարիզմի զարգացման համար անհրաժեշտություն է կուսակցական համակարգի կայացումը՝ վերջինիս արդիականացումը պայմանավորելով հասարակության լայն փոխակերպման գործոններով, կառավարման համակարգի և քաղաքական վարչակարգի բարելավմանն ուղղված փոփոխություններով:

Արժևորում ենք, որ ՀՀ-ում պառլամենտարիզմի զարգացմանն ուղղված գործնական առաջարկների ներկայացումը հեղինակն իրականացրել է փոխակերպման գործընթացում գտնվող տարբեր խումբ երկրների փորձի ուսումնասիրման և համեմատության արդյունքում:

Հետազոտությունն ունի հարուստ գիտական և աղբյուրագիտական հենք, օգտագործվել են թեմայի ուսումնասիրության հետ կապված տեսական հիմքերն ու հիմնական աղբյուրները: Օգտագործվել են գիտական մենագրություններ, հոդվածներ: Հետազոտության ուսումնասիրության իրավանորմատիվային հիմքը կազմել են ՀՀ օրենքները և իրավական ակտերը, պաշտոնական տվյալները, ինչպես նաև համացանցային մի շարք աղբյուրներ: Օգտագործվել են գիտական վերլուծական հաստատությունների և ուղեղային կենտրոնների ներկայացուցիչների հետազոտական նյութերը:

Ատենախոսության մեջ առկա են նաև որոշակի թերություններ, կան բացթողումներ որոնցից ցանկանում ենք նշել հետևյալները.

1. Ատենախոսության առաջին գլխի երկրորդ՝ ««Պառլամենտարիզմ» հասկացության մեկնաբանությունները» ենթագլուխը, մեր կարծիքով, անհաջող է ձևակերպված: Լավ կլիներ, որ ընդհանրական բնորոշման փոխարեն վերնագրում արտացոլվեր հեղինակի կատարած քննական վերլուծությունը:

2. Ատենախոսության երկրորդ գլխի երկրորդ՝ «Պառլամենտարիզմի առանձնահատկությունները հետխորհրդային երկրների փոխակերպման պայմաններում» ենթագլխի հետազոտության առարկան մեծ է և ընդգրկուն, ինչը հանգեցրել է որոշակի մակերեսայնության:

3. Ակացուցված իրողություն է այն, թե պառլամենտարիզմի համար որքան կարևոր է կայացած կուսակցական համակարգի առկայությունը: Մեր

կարծիքով ատենախոսությունը մեծապես կշահեր, եթե երրորդ՝ «Կուսակցական համակարգի կայացումը որպես պառլամենտարիզմի զարգացման նախադրյալ ՀՀ-ում» գլխում հեղինակն ավելի մեծ շեշտադրում կատարեր այն հարցին, թե կուսակցական համակարգի որ ենթատիպն առավել կնպաստի պառլամենտարիզմի զարգացմանը ՀՀ-ում:

4. Աշխատանքում առկա են տեխնիկական բնույթի որոշ բացթողումներ և թերություններ:

Մեր դիտարկմամբ, վերը նշված դիտողությունները էականորեն չեն զցում ատենախոսության գիտական արժեքը: Ատենախոսության եզրահանգումները գիտական են և բավականին արժեքավոր Հայաստանի քաղաքական գիտությունների համար: Ատենախոսական աշխատանքի շրջանակներում իրականացված հետազոտության արդյունքներով հեղինակը հանգել է այն եզրակացության, որ պետք է առավելագույնս զարգացնել խորհրդարանի ինստիտուտը: Այս առումով հիմնավորված է Հայաստանը ժողովրդավարական զարգացած երկրների քաղաքական ու իրավական համակարգերին ու եվրոպական չափանիշներին մոտեցնելու անհրաժեշտությունը: Այս հանգամանքը կարող է նպաստել ժողովրդավար երկրների հետ գործակցային հարաբերությունների զարգացմանը: Այս և մյուս եզրահանգումները կարող են օգտակար լինել ՀՀ ներքին քաղաքական հայեցակարգի առանձին դրույթների մշակման և նաև պետության քաղաքական դիրքորոշումների պարզեցման համար:

Ատենախոսության բոլոր հատվածներում առկա են թարմ և արժանահավատ գնահատականներ և համեմատություններ: Ատենախոսության շարադրման լեզուն և ոճը լիովին համապատասխանում են պահանջվող մակարդակին: Աշխատանքն աչքի է ընկնում հետազոտական հիմնահարցերի շարադրման հետևողականությամբ, հմտությամբ ու տրամաբանական հաջորդականությամբ: Համապատասխան եզրահանգումներն ու սկզբունքային հիմնադրույթները հայեցակարգային բնույթի են:

Հեղինակի հրատարակած գիտական հոդվածներում արտացոլված են ատենախոսության հիմնական դրույթները, որոնք ունեն ինչպես տեսական, այնպես էլ գործնական նշանակություն: Ելնելով վերոհիշյալ հանգամանքներից՝ գտնում եմ,

որ ԻԳ.00.01 - <<Քաղաքական գիտության տեսություն>> մասնագիտությամբ, քաղաքական գիտությունների թեկնածուի գիտական աստիճանի հայցման համար **Խոսրովադուլստ Գարեգինի Ազատյանի «Պառլամենտարիզմի առանձնահատկություններն ու միտումները փոխակերպվող հասարակություններում»** թեմայով ատենախոսությունը համապատասխանում է քաղաքական գիտությունների թեկնածուի գիտական աստիճանի հայցելու համար ատենախոսություններին առաջադրվող պահանջներին:

ԵՊՀ Քաղաքագիտության ամբիոնի պրոֆեսոր, ք.գ.դ. *Գ. Քեոյան* / Գ. Քեոյան/

Քաղաքական գիտ. դոկտոր Գ. Մ. Քեոյանի ստորագրությունը հաստատում եմ Երևանի պետական համալսարանի գիտական քարտուղար քանասիրական գիտությունների թեկնածու պաշտոնատեղում

Մ. Վ. Հովհաննիսյան

(կազմակերպության գիտ. քարտուղար)
29. 08. 2022 թ.



Մ. Վ. Հովհաննիսյան
(ստորագրություն և կնիք)